

REGIONAL NEWS BULLETIN

HEADLINES (EVENING)

1. Mizoram kawngpui pawimawh 2- National Highway 306 leh 302 chhe lutuk siamtha tura chak zawka hmalak dan ngaihtuah mek a ni.
2. National handloom day vawi 10na puala Mamit-a Hanloom Fair buatsaih chu vawiin khan Agriculture Minister Pu PC. Vanlalruataan Mamit ah a hawng.
3. Central Bureau of Investigation (CBI) chuan Delhi-a IAS exam tura inzir mek pathum coaching centre-a an thih dan a chhui dawn.
4. India tana medal la ngei tura beisei hmeichhe wrestler Vinesh Phogat chu final khel hmain phal chin aia a rih avangin khel thei loa disqualify a ni.

<><><>

KOLASIB HIGHWAY

National Highway 306, Mizoram chak lak na ber leh kawng pawimawh ber pawl, lirthei zawh harsa khawpa chhia chungchangah vawiin khan Kolasib DC Pu Robert C Lalmangaiha hovin ngaihtuah a ni a,

Kolasib DC chuan helai kawng hi Deputy Speaker hovin tun hnaiah pawh an en ho tawh a ti a. Amaherawhchu hmasawn na lian tham hmuh tur a awm loh thu sawiin, District level ah a tul ang ang ngaihtuah a hmalak dan tur buaipui ho tura thukhawm a nih thu a sawi.

NHIDCL hotute leh Contractor te pawh an harsatna te zawtin an kalpui tum dan te ngaihthlak a ni a. Contractor te tarlan danin pawisa an hmuh veleh theih tawp a hma an la ve a. A tul anga culvert te siam niin hmun thenkhat ah Paver block a an siam chu khawtlang mipuite ngenna angin concrete pavement a thlak a ni a, amaherawhchu a char chung ni 28 nghah a ngaih avangin duhthusam a hma lak theih a nih loh thu an sawi a. NHIDCL pawh in ngenna siam in kawng sira phalna la hmasa lo a approach road an lo siam thin chuan kawngpui ah tui a ti tling a, chu chuan kawngpui a tihchhiat thin thu an sawi a. Quarry bula stone dust te, kawng sira vantlang mipuiten an hmanrua an dah thin te leh an kawtkai a side drain siam an duh lo thin te chuan an hnathawh a tih harsat thu an sawi a ni.

Pu Robert C Lalhmangaiha chuan an harsatna te hriatthiamawm tamtak awm mahse mipuite mamawh em em thil pawimawh hmasa, a khuar zual lai hnawh te leh tawhsual tawh theihna tur thawmthat zung zung a tul thu sawiin, VC te nena thawhhona tha nei a an hun tiam chhunga zo fel tura tan an lak a ngai a ni, a ti . Tuna tang chuan khauh zawka District Administration pawh in an nawr tur thu leh tanpui an ngaih pawh in an tanpui tur thu a sawi a, a a tuar tu ber chu mipuite an ni a chuvang chuan mipuite tan kawng him leh hman tlak siam chu an tihmakmawh a ni, a ti.

Meeting ah hian DC bakah NHIDCL hotute leh Contractor te, Sr EE Kolasib, DFO Kolasib, Sub Hqs YMA Kolasib, Jt VC - Kolasib, Kawnpui, Vairengte , Bilkhawthlir te, Bualpui VCP, North Chhimluang, Thingdawl, Khamrang, Mualkhang VCP te leh Landowners te an kalkhawm a ni.

<><><>

NH 302

Lunglei leh Tlabung inkar National Highway-302 kawngpui laih zauh hna thawh mek dinhmun leh fur ruahsur avanga lirthei tlan leh khualzinte'n harsatna an tawh thin sut kian a nih theih nana hma lak dan tur thlithlain Lunglei District Deputy Commissioner ruahmannain inspection team ten an enfiah a.

Inspection team-ah hian Additional DC Pi Rochuangkimi Khenglawt bakah, Settlement Officer Pu Lalrinawma leh Land Revenue & Settlement (LR&S) Department, Lungleia thawktute an tel a. He lai kawngpui zauh hna thawh mek enkawltu NHIDCL hnuaiia Authority Engineer-te leh hna thawktu contractor-te'n lo dawngsawngin, fur ruahsur leh lei min avanga kawngpui chhe lai te, leivung paihna hmun ruahman dan te, hmun thum - Chhumkhum, Lungsen leh Tuichawnga khaw chung helna kawng by-pass road siam mek te en ho niin, NH-302 kawngpui chu mipui chakkhai leh mamawh phurhna kawngpui pawimawh a nih angin lirthei veivak leh khualzin mipuite'n harsatna an tawh loh nana chak zawka hna thawh a nih theih dan tur te, kawng chhe zual lai thawm that thuai a nih theih dan tur te sawi ho a ni.

Contractor-te chuan hmun thenkhatah chuan sub-grade an phah hnuah furin a nan avangin GSB phah hman a ni lo va, fur ruahtuiin sub-grade phah sa pawh tichhiain, kawngin a chhiat zual phah tih an sawi a. Kawng chhe zual lai pawh a theih ang anga an thawm that thin thu leh NH-302 Monitoring Committee te dina vil zui reng a nih thu an sawi bawk.

NH-302 kawngpui zauh hna thawh mek hi Hrangchalkawn atanga Tlabung thleng niin, kawng hluiah chuan kilometre 96-a thui a ni a. Tuna kawng thar ruahman ang chuan KM 75.070-a thui tur niin, package hnihah then a ni.

<><><>

PARAGLIDER

Khawvela Paraglider naupang ber, Samuel Lalbiakhlua, kum 11 leh thla 5 leh ni 3 a niha Paragliding Professional Course hlawhtling taka zova, khawvela certified paragliding pilot naupang ber ni thei hnena International Book of Records-in hriatpuina Certificate a pek chu Chief Minister Pu Lalduhoma chuan vawiin khan a office-ah a hlan.

Samuel Lalbiakhlua hi Pu MS Dawngzuala leh Pi C. Zonunsangi, Saitual Venglai te fapa a ni a. Paragliding Course hi

kumin March thla kha Bir Billing, Himachal Pradesh ah hlawhtling takin a zo a ni.

Certificate hlannaah hian a nu leh pa leh Mizoram Paragliding Association hruaituten an telpui a ni.

<><><>

ZMC

Health & Family Welfare Minister Pi Lalrinpuii chuan Zoram Medical College atanga pass chhuak zinga Doctor 39 te National Health Mission hnuaiia thawk tura lak nghal an ni, a ti.

Vawiina ZMC din champhaphak vawi 6-na lawmna a hmanpuinaah he thu hi sawiin, Pi Lalrinpuii chuan sawrkarin health sector, a bikin primary health sector ngaipawimawhin thingtlang mipuite ban phak PHC hrang hranga Doctor indaihlohna phuhruk dan kawng a dap nasa a ti a, Medical College tha nei turin hmunhma leh bungraw tha, zirtirtu fel leh rintlak bakah zirlai tha neih a pawimawh hmasak thu sawiin, ZMC ah Cardio-thoracic wing din turin State Sawrkar-ah rawtna thlen a nih thu leh IVF Centre neih theih nan ruahmanna siam mek a nih thu a tarlang bawk.

Health Minister chuan Medical Research lamah tanlak zual a tul thu leh Mizoram leh a chhunga chengte behchhan ngeia research neih a tul thu sawiin, mipuite'n hriselna tha zawk an neih theih nana ngaihtuahna seng turin ZMC a thawk Doctor te a sawm a. Medical science leh technology chhuak tharte chu inkawp tlat an nih avangin intuaithara thil chhuak tharte ngaihven zel turin a chah a ni.

Health Minister hian Crawford Gents' Hostel leh Hospital Management Information System (HMIS) a hawng nghal bawk a. He hunah hian Aizawl South-III bialtu MLA Pi Baryl Vanneihsangi pawh a tel a ni.

<><><>

NATIONAL HANDLOOM DAY

Mamit, Siamliana Hallah Agriculture Minister Pu PC. Vanlalruataan Handloom fair a hawng a, Handloom fair hawn zawh hian Chhim veng YMA hall ah National handloom day vawi 10na leh Workshop/ Awerness campaign on handloom livelihood chu a hmanpui.

ZOHANDCO Manager Pu C.Lalrinmawian kaihruiin he hunah hian Pu PC. Vanlalruata chuan thusawiin pi leh pute hun

atangin handloom te hi ngaihsan ala ni reng a, vawiinah mi inthuumnaah hmun a la luah a, mizo hmeichhiate chawi kannaturah handloom a pawimawh hle a ni a ti. Handloom chu Eizawna tling a ni tih sawiin, Mizorama industry lian ber ani a, eizawna tlak anih zel theih nan hmalak zel a

He hunah hian ZOHANCO Chairman Pu Lalliansawta pawhin thusawiin ram leh hnam din chhuah nan mahni deh chhuah a pawimawh a ni a ti.

National Handloom Day hi Mizoram Handloom & Handicrafts Development Cooperation Ltd (ZOHANDCO) buatsaih niin sorkar laipui Development Commissioner (Handlooms in a sponsor a ni.

Mizoram district hrang hrangah a lawmna hun hi hman niin, Aizawl ah pawh National Handloom Day pual hian Vanapa Hall kawtah stall engemawzat siam niin handloom dawr neitute thahnem tak an inpho a ni.

National Handloom Day hi kum 2015 atang hman tan a ni a, Prime Minister Narendra Modi an Chennai-ah hawngin, kumin hi vawi-10 hmanna a ni.

<><><>

CHAMPHAI MZP

Champhai Mizo Zirlai Pawl, Headquarters in Govt.Champhai College a Zirtirtu dahbelh tura sawrkar an nawrna chu vawin chawhnu dar 4:00 atang khan an chawlhsan a.

Hemi chungchangah hian MZP Hqrs. Champhai chuan thuchhuah siamin Govt. Champhai College-a Political Science leh Economics Department zirtirtu indaih lohna hnawhkhat tura Mizo Zirlai Pawl Champhai in Sawrkar a ngen chungchangah Sawrkar biak leh a ni a, Rationalization neih a nih hunah dah ngei tura theihtawp chhuah an inhuam avangin sorkar an nawrna an chawlhsan a, August thla chhunga Sawrkar in Rationalization a neih turah an mamawh ang zirtirtu pek ngei an nih theihna tura Sawrkar in hmalak a tum chu zahawm an ti tih an sawi a ni.

MZP Hqrs.Champhai hian an thilphut chungchanga sorkar nawr nan Govt.Champhai College a Zirlai leh Zirtirtute College a kal tur an dang a, ni 5 khan Champhai khawpuia Zirna In zawng zawng bakah Sawrkar Office kai turte, (Hospital OPD leh Bank te tiam lovin) dangin, ni 6 ah chuan Sawrkar Pisa kai turte chauh an dan hnuah vawiin kxanhuan Sawrkar Office bakah Bank Office

kai tur zawng zawngte an danga, Zirlaite nawrhna kal mek tihtawp a nih theihna turin Champhai District Joint NGO hruaituten hma lain vawiin chawhnu dar 1:00 atang khan Champhai District NGO hruaitute leh Zirlai Pawl hruaitute hian thil kalphung an sawiho a, hemi hnu hian MZP chuan an nawrhna kal mek chu tihtawp lailawk an remti ta a ni.

<><><>

BANGLADESH

Bangladesh sorkar buai chungchangah Lunglei dist thuneitu te chuan boruak awm dan thlithlai turin Tlabung leh Lungsen BDO leh SDO te chu an hriattir a. Vawiin khan Mizoram Police leh BSF te pawh ramriah Joint patrolling neiin an kal kual a, hriat theih chinah dan lova ramri kan an la awm lo.

Hemi chungchangah hian hranpa a duty tur a thupek chhuah erawh a la awm lova, dan an neihsa pangngai ang maia duty kalpui an ni tih kan corr thudawanna chuan a sawi.

Lawngtlaiah chuan District Magistrate Pu Cheemala Siva Gopal Reddy chuan nimin khan thenawm rama buaina a chhuah vangin ramri a kenkawhtur khapna thupek a chhuah a.

District Magistrate in thupek a chhuah ah chuan Bangladesh ah buaina nasa tak a chhuak ni a hriat a nih thu tarlangin, Lawngtlai District chhunga Bangladesh leh Myanmar ramri, Kilometres thum huamchhung ah tlai dar 6 leh zing dar 6 inkar ah veivah a khap a, Ran khalhluh leh khalh chhuah khap a ni a, Lirthei engchi mah veivah phal a ni lo bawk. Thupek hian thlahnih chhung a huam dawn a, thupek zawmlote chu hrem an nihtur thu District Magistrate in thupek a chhuahah hian tarlan tel a ni.

Hetihlai hian Bangladesh President Mohammed Shahabuddin chuan Nobel prize dawng tawh Mohammad Yunus chu sawrkar lailawk interim government hotu atan a ruat. Nimin khan Dhaka-a Presidential Palace-ah President, sipai pathum hotulute leh lungawihlohna lantirtu zirlaite atangin aiawh mi 13 te chu thukhkawmin an ram hruaitu atan Mohammad Yunus hi an thlang a. Political party hrang hrangte nen an inrawn hnuah sawrkar lailawka awm turte hi an tih fel tur chu President thupuangtu chuan a sawi a ni.

Mohammad Yunus hian Grameen Bank kaltlanga retheihna tibo tura a hmalakna avangin kum 2006 khan Nobel Peace Prize a dawng a. Bangladesh ramchhung buaina avang hian mi 440 an thi tawh a. Joshor district-ah chuan Awami League party hruaitu pakhat enkawl hotel kangah mi 24 aia tlem lo an thi nia hriat a ni.

Bangladesh-a India mi chengte nen an inbe pawp reng tih External Affairs Minister Dr. S. Jaishankar chuan nimin khan

Parliament in hnih a hriattir a. Dr. Jaishankar-a chuan New Delhi-in uluk takin thil thleng a vil reng tih Lok Sabha leh Rajya Sabha hrihlin a bik takin hnam tlem zawk minority te dinhmun a thlithlai reng a ni a ti.

<><><>

CBI

Central Bureau of Investigation (CBI) chuan Delhi-a IAS exam tura inzir mek pathum coaching centre-a an thih dan a chhui dawn. He thihna thleng hi a tirah Delhi Police te chuan an chhui hmasa a. Tunhnaiah Delhi-a Old Rajinder Nagar-a Coaching centre in hnuai berah hian mi pathum an thi a. Union Home Ministry chuan he thilthleng turin committee a din a. He committee hian vanduaiana thlen chhante, mawhphurtu zawnchhuah bakah coaching centre kalpui danah policy thlak ngai a awm em tihte an enfiah dawn a ni.

<><><>

PRESIDENT MURMU

President Draupadi Murmu chuan vawiin khan New Zealand a thleng a. Ni hnih a cham chungin Governor- General Cindy Kiro leh Prime Minister Christopher Luxon a kawm ang a. Wellington-a International Education Conference-ah thu a sawi bakah Auckland khawpuia India mi chengte nen hun an hmang ho ang. Tun tuma President Murmu-in New Zealand a tlawh hian ram pahnih inkarah thawhdunna tha zawk a thlen ngei rin a ni.

President Draupadi Murmu hian nimin khan Fiji-ah President Ratu Wiliame Maivalili Katonivere a kawm a. Suva khawpuiah ropui taka lo dawnawn a ni a. Mahatma Gandhi High School tlawhin Mahatma Gandhi zahna pangpar a hlan a ni.

<><><>

PARIS OLYMPIC

Paris Olympic neih mekah India tana medal la ngei tura beisei hmeichhe wrestler Vinesh Phogat chun kg 50 freestyle final khel hmain phal chin aia a rih avangin khel thei loa disqualify a ni. Indian Olympic Association chuan thuchhuah siamin team memberten zankhuuaa theihtawp an chhuah chung pawhin Phogat-I hi a tling zo ta lo an ti a. Prime Minister Narendra Modia chuan social media kaltlangin pawl a tih thu leh Vinseh Phogat chu India mite tan chuan champion a nih thu a sawi a ni.

<><><>